



India aser EU na tsüngda Free Trade Agreement agitsü: PM Modi

UEFA-i referee David Coote nem 2026 tashi tenokdangba agitsü

VOL. XXII ISSUE NO. 136 (ADOK 136)

DIMAPUR

KÜPTOKNÜ (SATURDAY)

METSÜREMI (MARCH) 01, 2025

₹ 5.00

Minister Kaito-i NFHRCC dang langzür

Dimapur, February 28,, 2025 (TYO): Nagaland sorkari Foothill Road yangluba dak sendakba tebilemtsü ajak angatetteptsü tenangzükba lir saka NFHRCC-i kuli maliba onüktem aser o tamajung agi nisung ka tenüng menüksütsü merangba mapa yabo aitsütsüla ta PWD (R&B) Aye-i metetdaksüogo.

"Mapa tenzuka aoba sentong ya contractor mulung lir saka iba sentong agiba atema tatok meshitsüla ta nenoki akhangba yabo tangatetba tamajung lir. Iba sentong agitsü atema nenok dang nungi temelaba meshitsü mesüra takhangba agütsütsü menüngdaker. Iba atema ni shinga danga tatok memeshitsü, saka mapatong tamakok ngura iba atemabo ni tatok meshitsü" ta Minister Kaito-i NFHRCC nem meyiptsüogo.

"Nenoki kü dak tarak kettsütsü merangba atema mepelar. Nia iba mapatong nungiter aser nenok den tokteptsü atema masü nübortem ajungtsü atema inyaker. Nenoki jembia arubatem meyipa repringang aser kümdanga jembiang kechiyong yimjak nungbo tim tesü dang jembiteper" ta paisa ashi.

"Ni küm aika public tenzükba wadang inyaka arudang Nagaland nung alirtemi kü nem shisatsü agütsüogo. Akhümtsübu ya takhangba agi masü saka alangzük. Nenoki terenlok atema noktaker süra ken o tem adokdaksüba masü saka tayongzükbatem koktetsü atema inyakang. Ken o tem angatetteptsü atema ni mulunga lir" ta Minister Kaito-isa NFHRCC dang shiogo.

Nagaland sorkari refrigerated vans 23 agütsü

Kohima, February 28, 2025 (TYO): Nagaland sorkari Hokolbarnü district 8 nungi Farmers Producers Organisations (FPOs) nem refrigerated trucks 23 tashi lema agütsüogo.

Iba mapa ya Department of Agriculture kübok FOCUS-IFAD mapatong ajanga teyari agüja inyaker. Iba mapa ya "Bridging Farms to Markets" omen nung ajemdaker inyaker.

Nagaland nung aluyimertemi tayongzükba tulutiba ajurubaji transportation lir aser iba nung yariteptsü atema Fostering Climate Resilient Upland Farming Systems (FOCUS) Nagaland-i FPOs 16 aser NGOs & Innovation Fund awardees aser tanga co-operatives 7 nem garitem agütsür. Iba ya International Fund for Agricultural Development (IFAD) ajanga agütsür ta State Project Director FOCUS Nagaland Shanavas C-i ashi.

FPOs ya Indian Institute of Management, Shillong nung training agiogo aser department-i FPOs ya master-trainers ama tanga FPOs nem training agütsütsü sentong renema lir.

Nagaland nung tang mezüng atema ibala garitem lema agütsür ta Shanavas-i ashi.

Secretariat Plaza nung sentong agidang Agriculture Advisor & MLA Mhathung Yanthan-i iba ya kanga dang tongtipang aser otsütsütsü sentong ka lir ta ashi.

"IFAD-FOCUS teloki gari 23 tashi anepaluba atema tenüngsang agütsür. Iba ya Nagaland nung mapa tajungtem rongnung ka lir kechiyong refrigerated vehicles 23 tashi state kübok tesem balalai yoker" ta Advisor Yanthan-i ashi.

"Aluyimertemi tsünütetbatem talisa aonsotsü aser süngianglijang amala melamela raksaba chiyungtsütem refrigerated vehicles ajanga belentsü. IFAD Focus project ya tesüiba küm trok tashi inyaka arur aser yimtsüng 608 nung aluyimertem ajangzükba mapatongtem inyaka arur" ta paisa ashi.

"IFAD Focus project ajanga beneficiaries 23 ajangzükjogo. Parnok rongnung FPOs 16 aser tanga telok 7 lir. Tang nungi nenoki aluyimertem aser shishilembadak sendakteptsü" ta Yanthan-isa ashi.

Amit Shah-i tanü Manipur tensa asadangtsü

Imphal, February 28, 2025 (Agencies): Union Home Minister Amit Shah-i Honibarnü Manipur nung security tensa meyipa repringangtsü. Manipur nung President's rule benokba sülen iba ama senden ya tang mezüng amentsü.

"Union home minister-i Honibarnü Manipur nung security tensa meyipa repringangtsü. Governor Ajay Kumar Bhalla, Manipur sorkar, Army, aser paramilitary forces nungi tongti ketdangsürtem iba senden nung adentsü" ta

ketdangsürtemi ashi.

Külen, Governor Ajay Kumar Bhalla-i auyaa bener aoba aser ozüng alema amshiba prangpongtem March 6 nikongdang 4:00 ako tashi nung agütsütsü mapang atsülangtsüogo.

Manipur nung hill aser valley nung alirtemi mepishiba sülen Governor-i mapang atsülangtsütsü lemtet.

Governor Bhalla-i February 20 nungi tenzük. Anogo tenet tsüngda prangpongtem agütsütsü tetuyuba agüja liasü.



Business Association of Nagas (BAN) küm tatem lokti senden Tsüklai (Feb.) 28 nü Dimapur nung mungogo. Iba senden nung BAN tir asütsü atema Wb. L. Mongküm Jamir shimshiogo. Iba sentong nung NIDC nung mendenbuba Wb. Kvulo Lorin tongti o jembir liasü. Iba lokti senden nung tongti o jembir (tsüngkoteptsü abener alisang) den BAN ketdangpurtem aser Sanen Luden züngsemtem noksa nung angur. (Osang Tapak 2 nung angutsü)

DUCCF-i department 3 tsüngdang RTIs benok

Dimapur, February 28, 2025 (TYO): Dimapur Urban Council Chairman's Federation (DUCCF)-i department asem den public mapatongtem atema Right to Information (RTI) ajanga osang tejangja meshiogo.

DUCCF Dimapur renloka aotsü atema tebilemtsü abener aser iba atema züngsem tenetnet adenba luden asem tenteta lir.

Ludentemi Dimapur Municipal Council (DMC), Under Development and Youth

Resources aser Sports department dang RTI ajanga osangtem metetnua asüngdangogo.

"Urban Development department (UDD) dang senotsü amshiba, Dimapur nung inyaksü aliba mapatongtem aser tembanga inyakba, anendaka mesüra meinyaki toktsüba mapatongtem indang osang tejangja meshiogo" ta DUCCF president Zasivikho Zakiesato-i ashi.

DUCCF-isa Youth Resources & Sports department dang Multi-Disciplinary State Stadium merenemetba atema RTI ka benokogo ta paisa ashi.

Parnokisa Dimapur Municipal Council (DMC) dang mapa inyaktertem osang tejangja, mapa nung shimokba inyakyim, sen aruba aser mapa inyaktertem nem itasen agütsütetsü asü masü ta tasüngdangba agüja RTI ka benokogo ta Zakiesato-isa metetdaksü.

Mapa nungi anentsüba police constables-i lungkak ait



Kohima, February 28, 2025 (TYO): Yaküm September ita High Court-i mapa nungi anentsüba Nagaland police constable temi Hokolbarnü Police Headquarters kima nung lungkak aitba sentong ka agiogo.

September 20, 2024 nü Gauhati High Court-i January 2018 aser October 2019 tsüngda advertisement kecha melii police constable 935 mapa nung shimokba agiena liasü. 2022 nung unemployed Naga youth-i Writ Petition ka benokba atema GHC-i iba oshidang agütsü.

GHC-i sorkar dang osangkakettem nung advertisement timi asütsü aser ozüng den putepa fresh selection asütsü tetuyuba agütsüogo.

Iba maparen ya tekaratiba nung inyaksü aser kokra iba obendang agütsüba sülen ita trok tsüngda inyaksüla ta GHC-i metetdaksüogo.

Ajisüaka, iba oshidang atema mepelaba sayua Hokolbarnü constable tem PHQ junction nung adenshi. Parnoki "We are indigenous Nagas", "Set course for the future but don't finish the

past", "We have taken oath of allegiance", "We want justice" tezülubatam amer timi lungkak aitba sentong ka agia liasü.

Parnokisa Director General of Police nem memorandum ka agütsü saka iba osang zülü tashi nung iba memorandum nung kechisa zülua lir memetet.

DGP Rupin Sharma den tongti police ketdangsürtemi iba ken o atema Deputy Chief Minister in-charge of Home, Y Patton den senden ka amenba osang angazük. Saka iba senden nung kechi koma jembi ano memetet.

BAN lokti senden amen, ketdangpur tasen shimogo

Dimapur, Tsüklai/February 28 (TYO) : Business Association of Nagas (BAN) pur Annual General Meeting Hokulbarnü Espace, Duncan Bosti, Dimapur nung takok ngua mena liasü.

Iba senden nung BAN ketdangpur, executive council, advisors, patrons, governing council members, associate members aser region tesem balala nungi entrepreneurs tejangja adenshia Nagaland atema rongsenketzüing aser business tasa balala indang jembia liasü.

Warehouse Church nungi pastor Jack Pucho-i sarasadema iba senden tenzük aser L Mongkum Jamir-i tir o jembia liasü, shiba kümsük tanabuba atema tir ka ama tanaben shim.

Mongkum Jamir-i taruba küm asem atema mangdang lemsatep aser 'business enablement, financial access, policy advocacy, rural

entrepreneurship aser structured business ecosystem' yanglutsü indang jembia liasü.

India indang Viksit Bharat mangdang den lirumedema BAN-i rongsenketzüing tsütsü pei peria alitsü, industrialization aser global business expansion nükjiding nung inyakba indang pai nenshia ashi.

Kvulo Lorin Chairman, NIDC / Director, Tetso College ajanga tayongzükba o jembidang Naga nung shishilempartem dang local markets alema oa national aser global level nung tokteptsü ayongzük.

Pai digital temelenshi, senotsü amshiyim metetba aser business ainba metettsü nüngdaker ta ashi aser technology tajungtem amshitsü ayongzükba liasü.

Pai shishilempar tem dang market tajungba tongtetsü asoshi alliances kumtetsü ayongzükba liasü.

2025-27 atema BAN

ketdangsürtem: tir - L Mongkum Jamir, tatong tir tem - Zubeno Mozhui (Women), Benthungo Kithan (State), Colo Mero (National), Inoto Kinimi (International).

Executive Council züngsemtem Akum Jamir, Tiatemsu Longchar, Kedo Nagi, Renathung Ezung, Watila Longkumer, Nukuzo Phesao, Lezo Putsure, Achentiba Imchen, Azolo Nuh, Maj (Retd) Vikuto Asumi, Lemjan Phom, Trongli Sangtam, Akherio Lazio aser Alobo Naga alitsü. Governing Council Members: Dr. Yan Murry, Thungbemo (Ex-President) aser Vitho Zao (Ex-President). Advisor nung Jwenga Seb, Thangi Manen, Nibu Nagi aser Ababe Ezung nungertem alitsü.

Senden tembanga Alobo Naga, Executive Council Member ajanga melepzüng o jembi aser Colo Mero, Convenor, Standing Committee on Sport ajanga sarasadem.

Mokokchung DC-i long poksatsü melar

Dimapur, Tsüklai/February 28 (TYO): Deputy Commissioner, Mokokchung, Thsuvisie Phoji-i D.E.F Police Church nungi Yisemyong tsüingta two lane yangluba NH 61 (New NH 02) nung Angetyongpang Tzu River area nung March 4, 2025 nikongdang 3:00 ako nungi aonung 10:00 ako tsüingta long poksatsü JKM Infra Works LLP Guwahati, Assam dang melar, ta sangdong

ka nung metetdaksü. Contractor temi iba lenmang amshiba nüburtem takum aser ki o jen meraksatsütsüsa iba mapa inyaksüla. Company-i Explosives Act/Rules, 2008 indang ozüng ajak sülen anidaksüla aser nisung takum aser ki o jen raksatsüba lira JKM Infra Works LLP khuret asütsü, ta sangdong ajanga ashi. Iba totuyuba ya March 4, 2025 atema alitsü.

PRCs Monitoring ajanga Mokokchung semdang



CHC Changtongya nung monitoring team den Medical Officers aser Health workers tem külemi tangokba noksa nung angur.

Dimapur, Tsüklai/February 28 (TYO): Ministry of Health & Family Welfare ajanga Mokokchung district nung aliba health facilities nung NHM programme tem mapa kuma inyakba asadangtsü asoshi Population Research Centres (PRCs) Guwahati ajanga February 27 & 28, 2025 anogotem semdanga liasü.

PRCs tenüng nung Guwahati University nungi Karuna Gogoi aser Kunal Dan nati Imkongliba Memorial District Hospital Mokokchung, Changtongya

CHC, Tuli CHC, Mongsenyimi PHC, Sabangya PHC, Ungma PHC, UPHC Yimyu, Khensa HWSC, Changtongya HWSC, Yaongyimsen HWSC aser Yisemyong HWSC semdanga liasü.

Iba mapang monitoring team yagu Medical Officers, Health workers aser ASHAs tem den tang teinyakdak maparen balala indang asüngdangya asü aser management, ANC, immunization aser patient records bendena ayuba indang repranga liasü.

DIPR nung tuberculosis awareness sentong agiogo

Dimapur, Tsüklai/February 28 (TYO): Directorate of Health & Family Welfare-i tenzüksüba "TB Free Nagaland" campaign nung shilem ka ama National Tuberculosis Elimination Programme kübok February 27 nü Directorate of Information and Public Relations, Kohima nung awareness sentong ka agiogo.

Iba sentong nung Department ketdangsür aser staff temi shilem agi aser Joint Director, Simon Teilia-i achaayanga TB Muktbharat" tenangzüktepba agir tembanga liasü. Iba sentong ya nüburtem nem tashidak menatepa aoba mesüra tashidak menatepa aoba koda nokdangtsü iba indang tangazükba agütsütsü asoshi dang masü, saka tashidak dak mesenmetu sendaka aliba anema nokdaksü asoshi tangazükba agütsütsü nükjiding nung agir.

Iba sentong ya TB dak sendakba nung tangatetba tai aliba tem angajemdaksütsü asoshi tenzükba lir. Campaign ajanga, aketba aser hajiba mapang tebang aser teni nembangtsüba, nüburtem adenshiba tesem nung metsü memetsütsüba, sputum shitak intoktsüba aser mopung peria aruba tesem nung alitsüba amala tashidak nungi pila alitsü atema respiratory hygiene tem metetdaksür.

Campaign ajangsa, Directly Observed Treatment, Short-course (DOTS) course tembanga agitsü koda tongtibang iba indang metetdaksüba den TB agi shirangertem ya temang anepalu tenzük hopta ana dang lirbo parnok dak nungi tashidak memenatsü ta nüburtem nem metetdaksür. Maneni osang aginertem atema toll-free Ni-Kshay Helpline (1800-11-6666) lir.

Iba campaign ya tashidak takaratiba nung putettsüba atema rangloker inyaker aser aketba ya dang TB keta aliba temaitsü masü, saka tema meta shirangba, teku ashiba, tekong mesüra kikilatsü awakba, shitemang ajungbena melenshiba, ajungbena temang tozü tajemba akümba, alokmetzü dena aketba, alokmetzü nung azü ket adokba aser aonung asentzü ayimba amala densema lir. Temang kanga junga anepalutsü aser tashidak prokshia aoba nokdangtsü atema tashidak kara kara potettsü kanga tongtibang lir.

2025 küm tashi nungbo linük ajunga nung TB tashidak samatsütsü atema nükjiding yur aliba ataloktsütsü atema Nagaland-ia jenjang agiba mapang tang iba awareness sentong ya agiogo. Tuberculosis tashidak meshimeshia samatsütsü asoshi ajaki longjemer inyaksüla, nüburtem nem tangazükba agütsütsüla aser shilem agitdaksütsüla, nokdangtsü atema jenjang agitsüla aser tashidak keta aliba mesenmetui amshiba aginja ajak longjemer inyaksüla, ajita sünungdang Nagaland tarutsü tajungba asütsü.

Kohima nung Nagaland CineFest 2025 tenzükogo



Advisor to Chief Minister of Nagaland & Chairman, Investment & Development Authority of Nagaland (IDAN), Abu Metha den OSD, Transport Department, Abebe Ezung, Director, IPR, Dzüvinuo Theünuo aser IPR nungi ketdangsürtem February 28, 2025 nü Heritage, Kohima nung Nagaland CineFest 2025 tenzükdang tangokba noksa nung angur.

Dimapur, Tsüklai/February 28 (TYO): Department of Information & Public Relations ajanga Ministry of Information & Broadcasting aser National Film Development Corporation of India (NFDC) den lungjemer "Celebrating Stories, Inspiring Minds" omen nung ajemdaker Heritage, Kohima nung ayongzükba Nagaland CineFest 2025 sentong February 28, 2025 nü tenzükogo.

Iba benjong ya Advisor to Chief Minister of Nagaland & Chairman, Investment & Development Authority of Nagaland (IDAN), Abu Metha-i tenzükja liasü.

Iba sentong nung jembidang, region nung aliba nüburtem ajangzüksütsü asoshi state nung CineFest 2025 ama sentong tali ayongzüksütsü imlar, ta Abu Metha-i ashi.

Film yangluba ya profession ka lir, koba ajanga nisung meimchir indang tekolok tajungtiba sayur aser film yanglur temi tanü indang otsü, yashi indang ajangshibatam bendener aser tarutsü putu asoshi sempet yutsür, ta pai ashi.

India nung film industry khenyongi melenshiogo aser social media, OTT platforms aser digitalisation ajanga film industry arok meyong ama kuma

film yanglur aser content creators temi second ishika tsüingta alima nung kinük-kisang ajak tongteter aser nüburtemia pei mangdang aser tejangraba ama inyaksü melar, ta Metha-i ashi.

CineFest Nagaland 2025 ama benjongbentsü, films, cinema, sport, music, dance, entertainment amala ajunga ya creative economy nung shilem ka lir aser state nung sempet aketer peria lir, ta pai ashi.

Hornbill Festival nung films aser cinema dak sendakba benjong timba aser tuluba alitsü asoshi state sorkari Department of Information & Public Relations den teka amteper inyaksü, ta Abu Metha-i ashi.

Iba atema state sorkari Ministries, Foreign embassies/ Governments aser film industry nungi film yanglur aser actors tem den lungjemer inyaksü ta ashi.

Sentong nung Joint Secretary, Information & Public Relations, Kusa Fithu-i film tem ajanga nisung takum nung kongshiba indang lemsatepdang film yagi nisung ka nem shisatsü agütsür, ajungmesor aser film indang 'universal language' yagi

alima nung aliba nisung sendakteper aser lungjemdaksür, ta ashi.

Nagaland CineFest 2025 yagia film yanglur, actors, producers aser film enthusiasts tem ajungmesotsü aser shisa agütsütsü imlar, ta lai ashi.

Nagaland CineFest 2025 ya February 28 nungi March 1, 2025 anogo tashi alitsü. Mezüng anogo Moses Mark, Singapore ajanga 'The evolution of film editing: cinema to digital age,' - A historical journey through major editing techniques innovations nung masterclasses agütsü aser Bendang Walling ajanga 'Nagaland, New Horizons' onük nungi jembi.

Ano Hokulbarnü CineConnect - A conversation with Bendang Walling, LC Sekhose, Khrievilie Suohumvü, Kikru Neikha and Mr. Smile ta sür sentong ka agia liasü.

Mezüng anogo Eleison (Have mercy) - directed by Raymond Colney (Mizoram), Chanchisoa (Expectation) - directed by Elvachisa Sangma (Meghalaya) aser Paper Airplanes - directed by Moses Marks (Singapore) nungertem sayua liasü.

India aser EU na tsüngda Free Trade Agreement agitsü: PM Modi



February 28, 2025 nü New Delhi nung Ato kilonser Narendra Modi aser European Commission Tir, Ursula von der Leyen na senden amentsü lia tangokba noksa nung angur.

New Delhi, February 28 (Agencies): Hokolbarnü Ato kilonser Narendra Modi-i, European Commission Tir aser College of Commissioners to India-i taküm küm tatembanglen tashi nungbo India den Free Trade Agreement agitsü, ta metetdaksü.

Ato kilonser Narendra Modi-i, "European Commission-i semdangba ya

tang mezüng dang masü saka tang mezüng kanga tongtibang sentong ka lir. Iba ya Commission tasenbai tang mezüng bendang linük semdanga lir," ta metetdaksü. "Tesüiba küm 20 tsüngda India aser EU na tsüngda asalentong tsütsü partnership junga lir aser tamendakdakji tamang katetba aser democratic inyakyimtem nung ajemdaker

lir. Yashi onoki kanga tetezü kateta ken o lemtepogo. Onoki team anaprongla dang Free Trade Agreement ajanga ajak ajangzüksü aser taküm küm tatembanglen tashi nungbo iba maparen renemtsü atema inyakang ta shiogo," ta Ato kilonseri metetdaksü.

European Commission Tir, Ursula Von Der Leyen-i, India aser European Union nati taküm Free Trade Agreement agitsü bangjemogo, aser iba ya alima nung tezüngzüktep tulutiba asütsü, ta metetdaksü.

"EU aser India na tsüngda Free Trade Agreement ji alima nung iba ama tezüngzüktep rongnungbo tulutiba asütsü. Iba ya temelabo masütsü, ta ni meteta dang lir. Ajisüaka iba tezüngzüktep ya telok anaprongla atema mapang tetemsü ka nung agir asütsü, ta ni meteta lir," ta Ursula Von Der Leyen-isa metetdaksü.

"Ibayongji taküm kümsa iba maparen renemtsü atema inyaksü asoshi onoki Ato kilonser Modi den melungtepogo," ta laisa shisem.

Uttarakhand nung Badrinath Dham anasa nisung 57 anenbang

New Delhi, Tsüklai/February 28 (Agencies): Hokolbarnü Uttarakhand state nung Chamoli district kübok Mana yimdak Border Roads Organisation site nung rürjep anenzüka aluba lendong nung mapa inyaker 57 anenbang aser nisung 16 bo kümzükgogo.

Tenemlen nungi rürjep tulu anenzüka aluba ajanga Mana aser Badrinath Dham na tsüngda Border Roads Organisation indang camp ka anenbangogo, ta Chamoli District Magistrate, Sandeep Tiwari-i metetdaksü.

Osangbener den jembidang Police Headquarters nung otongdar, IG Nilesh Anand Bharne-i, "Mana kübok arrtsülen Border Roads Organisation camp anasa rürjep anenzüka aluba ajanga gari lenmang mapa inyaker nisung 57 anenbangogo. Mapa inyaker nisung 10 bo kümzüka army camp-i anir ogo," ta metetdaksü.

BRO (Border Roads Organisation) Executive Engineer, CR Meena-i, "Iba lendong atalokba mapang iba tesem nungji mapa inyaker 57 liasü. Ambulance asem-pezü


yokogo saka rürjep kanga alaba ajanga rescue team iba tesemji tonga mouteter," ta metetdaksü.

Chief Minister Pushkar Singh Dhama-i X ajanga, "Chamoli district kübok Mana yim anasa BRO mapa inyaker aika rürjep agi anenbangba osang angashia jashir. ITBP, BRO aser tanga team aikati kümzükgba maparen inyakdar. Aayanger adianutem ajak kümzükgang ta ni kibuba Badri Vishal dang sarasademer," ta metetdaksü.

State Disaster Response Force (SDRF), National Disaster Response Force (NDRF), district administration, Indo-Tibetan Border Police (ITBP) aser Border Roads Organisation (BRO) team-i tanüngba nisungtemji kümzüksü merangdar.

India-Tibet arrtsülen tatembangbuba yimji Mana lir aser iba yim ya metre 3,200 temalen lir.

India Meteorological Department (IMD)-i Uttarakhand densema tenem aliba region aika nung tzünglu sashia arutsü, ta jelia metetdakja lir.



February 28, 2025 nü New Delhi nung Congress Tir Mallikarjun Kharge, Lok Sabha nung opposition lenir Rahul Gandhi aser party lenir KC Venugopal hungeri Kerala nungi Congress lenirtem den senden amendang tangokba noksa nung angur.



GOVERNMENT OF NAGALAND
DIRECTORATE OF TECHNICAL EDUCATION
Nagaland : Kohima - 797004



NO.DTE/SCTE/6/2023-24/7208

Dated, Kohima the 28th February, 2025

NOTIFICATION

NO.DTE/SCTE/6/2023-24: Interested Candidate are hereby informed to fill up the Prescribed Application Form to undergo 3 (three) years Diploma Courses in State run Polytechnics for the academic session 2025-26 w.e.f. 3rd March till 29th March 2025 which will be issued from the office of the undersigned as well as Government Polytechnics during office hours on all working days. Candidates who have appeared HSLC/HSSLC final examination of 2025 are eligible to apply for the Diploma Selection. However, they will have to submit necessary documents within stipulated time period and fulfill all criteria for selection to study Diploma Programme.

Application Form & Prospectus 2025 may also be downloaded from the website <https://dte.nagaland.gov.in>, in which case the fee of Rs. 200/- (Rupees Two hundred) only may be deposited while submitting the Form.

Programmes offered in the Polytechnics.

Sl. No.	Name of Polytechnic	Program Offered	No. of Seats	Minimum Qualification
a	b	c	d	e
1	Khelshoshe Polytechnic, Atoizu (KPA)	Civil Engineering	60	HSLC/10+ passed in Maths & Science
		Mechanical Engineering	30	
		Electrical & Electronics Engineering	30	
		Automobile Engineering	30	
2	Institute of Communication & Information Technology, (ICIT) , Mokokchung	Computer Science & Engineering	15	
		Electronics & Communication Engineering	8	
3	Government Polytechnic, Seithekema 'C' Chumoukedima	Civil Engineering	40	
4	Government Polytechnic, Sedem, Tuensang	Civil Engineering	30	
5	Government Polytechnic, Tsunazho, Chetheba, Phek	Electrical & Electronics Engineering	30	
6	Government Polytechnic, Aboi, Mon	Civil Engineering	30	
7	Government Polytechnic, Kohima (GPK)	Civil Engineering	30	
		Computer Science & Engineering	30	
		Fashion Technology	30	HSLC/10+ Passed
8	Government Polytechnic, Doyang, Wokha	Architecture Assistantship	15	HSLC/10+ passed with Maths & Science with aggregate of 55% (or) HSSLC passed with Physic, Chemistry & Maths (PCM) with aggregate of 50%
9	Government Polytechnic, Peren	Interior Design	15	

Sd/-
(ER. VIPULHOU LHOUNGU)
Director



AXIS Bank Ltd
A.C.Market, 4th Floor, 1, Shakespeare Sarani, Kolkata- 700071
Hon oset E-Auction asütsü sangdonger

Talisa sen apurtem aser public dang tsünglanglen agüja aliba Branch nung Axis Bank-i hon osettem public auction asütsü ta sangdonger. Tsünglanglen shia aliba sen apurtemi bank security atema Axis Bank Limited nem hon osettem agüja ("Gold Loan Facility") sen apu. Demand notices ajanga sen apurtem/Guarantors dang Gold loan facility agiba sentsüh agüjang ta metetdakja liasü. Sen apurtem/ Guarantors-i sentsühji magütsüstet nung bank-i hon osettemji e-auction asütsüsa akümer. Tsünglanglen shia aliba ama 10-03-2025 (anogo) nikongdang **12.30 ako nungi 3.30** ako tashi (e-auction asütsü mapang) "Kong aliar yamaji", "Koma lida yamaji" aser "Yangji aliba ajak" aser "No Recourse Basis" nung auction asütsü. Sen apurtem aser sentsüh osang tejangja.

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net Weight Grams
DIMAPUR [NL]	M HENO LUSHING	XXXXXXXXXXXX7557	273009	20-Nov-23	71.100	61.000
DIMAPUR [NL]	KRIPASINDHU DEY	XXXXXXXXXXXX2474	195851	29-Sep-23	54.100	49.000
DIMAPUR [NL]	PRABRIT DAS	XXXXXXXXXXXX4466	74876	5-Aug-24	17.900	17.500
DIMAPUR [NL]	WATILEMLA AIER	XXXXXXXXXXXX2129	53308	5-Aug-24	13.800	12.300
DIMAPUR [NL]	BITTU DAS	XXXXXXXXXXXX5010	47140	7-Sep-24	10.300	10.000
DIMAPUR [NL]	SHANKAR PRADHAN	XXXXXXXXXXXX1671	48989	8-May-24	16.000	11.900
DIMAPUR [NL]	SHANKAR PRADHAN	XXXXXXXXXXXX7957	41892	20-Jul-24	13.300	10.000
LHOMITHI BAZAR NL	DEVKARAN DEVKARAN	XXXXXXXXXXXX0971	112932	20-Nov-23	32.400	30.000
LHOMITHI BAZAR NL	DHAWA SHIRING TAMANG	XXXXXXXXXXXX2354	109716	28-Nov-24	23.200	23.000

Jelia osang memetetdaksüi account agientsü/auction anogo melenshiitsü atema Axis Bank Ltd. dak tashi lir. Auction ji online <https://gold.samil.in> (website of online vendor) ajanga nikongdang **12.30 nungi nikongdang 3.30** tashi agitsü. Osang tejangja aser telatetbatemji agüja aliba website <https://gold.samil.in> (website of online vendor) nung reprangtsü akok.

Anogo: 01.03.2025 Tesem: Kolkata

Authorized Officer Axis Bank LTD.



कर्मचारी राज्य बीमा निगम
श्रम एवं रोजगार मंत्रालय भारत सरकार
EMPLOYEES' STATE INSURANCE CORPORATION
Ministry of Labour & Employment, Govt. of India



क्षेत्रीय कार्यालय, पूर्वी क्षेत्र
REGIONAL OFFICE, N. E. REGION
बामुनीमाईदाम, गुवाहाटी-781021
BAMUNIMAIDAM, GUWAHATI-781021
Website: www.esic.gov.in, E-mail: smo-ner@esic.nic.in

अरुणाचल प्रदेश, असम, मेघालय, मणिपुर, मिजोरम, नागालैंड और त्रिपुरा राज्यों में कर्मचारी राज्य बीमा निगम के लाभार्थियों को सुपर स्पेशलिटी चिकित्सा उपचार और जांच सुविधाएं प्रदान करने के लिए सरकार/ अर्ध सरकारी / पीएमजेएवाई / सीजीएचएस पैनलबद्ध / निजी अस्पताल / निदान केंद्रों से पैनल में शामिल होने के लिए अर्जी की मांग (ईओआई)

Arunachal Pradesh, Assam, Meghalaya Manipur, Mizoram, Nagaland & Tripura state tem nung ESIC Beneficiaries nem Super Speciality Treatment aser Investigation facilities agütsütsü asoshi Government/Semi govt./PMJAY/CGHS Empanelled/Private Hospitals/Diagnostics Centres empanel asütsü atema Expression of Interest (EOI) meshir.

Regional director, ESIC Regional Office, Panchdeep Bhavan, Bamunimaidan, M.R.D Road Guwahati-21-i Arunachal Pradesh Assam, Meghalaya Manipur, Mizoram, Nagaland & Tripura state tem nung aliba Government/Semi govt./ PMJAY/CGHS Empanelled/Private Hospitals/Diagnostics Centres dang CGHS rate nung cashless basis ajanga ESIC Beneficiaries nem Super Speciality Treatment aser Diagnostic Services agütsütsü atema Expression of Interest (EOI) meshir.

Osang tejangjaba metettsü atema tejangrar Health Care Organizations (HCOs)-i website www.esic.gov.in/tenders **Console No. 12879/2025** mesüra www.eprocure.gov.in/eprocure/app **Tender ID: 2025_ESIC_848556_1** nung reprangtsü akok.

EOI (Online) agütsütsü atema tatembangbuba anogo aser mapangji: **10-03-2025 nikongdang 05:00** ako tashi.

Regional Director
ESIC, RO, Guwahati

CBC 23123/12/0015/2425



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 01, 2025

Govt dak temulung melemteter !

Ngaland nung alir Naga nunger asoshi timtem tulutibaji government dak temulung melemtetba ya asütsü. Aji oda, Nagaland government ta kodang südir mapai mao ita sen agizüka achir meyong government amato bilemer. Kasaji, nübortemi Nagaland government meyong osep(dictionary) nungbo 'ochi' ta asüba ojang ya mali südi bilemer. Iba jagi, kodang Nagaland government ta südir, shitak inyaktsü asüyonga meshitak inyaktsü amai dang bilemadoker. Aji oda, kodang Nagaland government ta südir ajaki mashimashi inyaktsü amai bilemer. Ibaji Nagaland government nung alirtem asoshi dang masü saka nübortem asoshi kanga tia maka asütsü, kechiyong nübortem ya government asoshi masü saka government-ji dang nübortem asoshi lir. Anungji, kodang nübortemi government dak temulung melemdir, aji tanurtemi tsürabur jakla tamajung aketertem dak temulung malemer amai kumadoker. Iba ama temeimsü tia ka nung, nübortemi pei government dak temulung lemdi asüyonga lemtettsüla masü anogo shia government mapa nung ataloker. Aji oda, tang iba yimobilem zülü tashi nunga Dimapur nung government school ka atsünga aruagi mozü ki lapokba ajanga kaketshirtemi shibanga yutsüba aser tenemtsüng lenmang yanglutsüba maparen nunga nübortemi government dak temulung malemba agi Nagaland Foothill Coordination Committee purtemi contractor-tem den tangatettep ken o balaka zülutepa yur külenang mapa tenzükdaaktsütsü renemba ken o boluba angashir. Atangji, Nagaland nung nübortemi repranga meinyakdaaktsüra government-i yangluba kilentzü nungbo motzüa meyimoktetsü aser government-i yangluba lenmangji shitakba senotsü lemkütsüba mapa dang nungi tilaba, tapuba aser tamajungba asütsü. Atangji, nübortem asoshi government-i inyakba mapatem gari lenmang süshia mesüra kiojen yangluba süshia, ajakji mapa inyaktsü pur contractor-tem den mapang shitak nung mapa shitak inyaka renemtsü asoshi tenangzüktepba ken o 'contract' tejangja renema ayur. Ajisüaka, Nagaland government mapabo mapa merenem ser toktsüyonga renemer amai mapa renemba kuli 'completion certificate' agütsür, anungji mapa kar shitak meinyak aser karbo terenema merenem ser kanga junga inyaker amai zülü nungbo ajak shitak yur sen agizüka agir. Iba kasaji tawa Langpangkong lena atalokogo, ajisüaka Langpangkong Road Co-ordination Committee aliba ajanga government-i mapa renemba kuli agütsüba agi mapa anener liaka, contractor-ji jar mapa shitak renema inyakdaaktsüba osang angashir. Iba amaji Nagaland nungbo nübortemi nungsen agia government mapatem mita mereprangra, mapa shitak inyaker senotsü agizüka agiba otsübo kangabo mangashitsü. Iba ama temulung melemtetsüsa government nung inyakertem aliba agi nübortema talila nüken belem agitsüsa adoker, kechiyong terenlok mapatemji nübortem asoshi inyaker aser terenlok mapatem madak kiburji nübortem lir. Aji oda, Foothill Road Committee purtemi bilemba amaji, Nagaland nungbo mapa inyakertem den züngzünga tezülutep ka yur inyakyonga, ano nüken belem aser nungsen talila agia repranga meinyakdaaktsüra, Nagaland nungbo government mapaji mapa masü akümtsü. Iba ama government dak nübortemi temulung melemtetsüsa akümba ya shia arudaktsütsüba, atangji, Naga yimten teblemtsü akoktsü asoshi inyakba khuret den kasasa amai kumadokogo. Aji oda, nübortemi government dak temulung melemtet tashi, nübortemi government nung alirtem akhüm metsübuttsü aser nübortem temulungjang nung parnokji lua bilemtsü. Anungji, nübortem o government na tsüngda temulung melemteptsüsa akümba tashimait aser mekokmein ajak ya endoker, nübortemi government mapa nung temulung lemtettsüsa alitsüba government nung alirtem nungi tenzüktsüba ajak asoshi kanga nungdaka kumogo.

OLEMSABANG

Osang kaket (News paper) nung kibok sensaksem

Molungkimong Literature Board

Tir Yimyim Adok dt. February 14 & 15 Olemsabang nung K. Tia Longkumer, Principal, Haven of Hope Seminary, Dimapur ajanga Molungkimong Literature Board den pa tebilemba oren kar lemsatepogo. Taoba mapang Tir Yimyim Olemsabang nung Osang zülur asem den zülutepba ngua pa tebilemba kar den temotongshitsüba kar sarasadema zülü aser parnok asem indang 'status-a' kanga junga shiogo. Kaket aser Osangtsüsang zülurtemji lokti nung alakteta tashi temeteterem ta alimai meteta lir, anungji parnok indang onoki talila mashir.

Aserbo, Tebu aser Techir (Father and Son) tsüngda tebilemba kibok sensaksem osang kaket ajanga ang agitsüba yabo onokibo jangratema mebilemer. Ana tsüngta Arogo otsü dak sendakba nung sensaksem akatsü onük aika lir, anungji nungdak süra asenok ajurutepe tejak jitepa mener otsü atongtsü onoki bo teti mulunga lir.

Parnok ajaki zülubaji ABAM nem ang langzüdaktsünüa nai bilembaji kechiba ta masüngdang saka iba dak sendakba ken O ajak ABAM Inti mungdang nung tembanger aser joko lepa mejembitsü ta sangdongadoker, anungji ABAM Ozüng raksa-a ABAM-i bo langzüksü madoker. ABAM-i 2016 'ABAM Temzüng' (Revised) Jili O nung tejangja shia lir aser ABAM yangji nokdaka lir. Aser iba Temzüng Jili O nung ajemdaker telemtetba agia arudar. 9th April 2020 ABAM Shite nung, "ABAM TENOKTAKTAK ASER TELEMTEBAAMAMELITETER DEN ABAM-I KECHASHILEM MAGITSÜ" ta sangtonga lir, aser yamaji Molungyimsen 2022 küm jili SQC amungba nung ABAM-i shilem magi. Yamaji, ABAM Rongdak Inti Mungdang June 4, 2024 akaba mapang, Molungyimsen dang Court nung case agüja aliba withdraw asütsü mepeshitsü lemtet. Aser "iba temepishiba magizükterra ABAM-i lemteta aliba dak ajemdaker amalitep makatsü (SLT/2020-07)" lemtet. Ibaji ABAM final tenoktakdak lir.

1872 küm Naga tenem nung mezügbuba Arogo ji Molungkimong (Deka Haimong - Ahom Chubai jaloktsüba, Deka Haimong tetezü Lanur Yimkong) nung tenzük, aser iba otsü nung mangatettep kecha mali. Saka nai senmangren indang ashiba yabo tim masü. Nai yamai zülü, "saka iba ya nenok Molungkimong aser Molungyimsen nung alirtem tetsü tebou nungeri agizük asünungji nibo ya nenok ajak arok senmang ta angateter." Nai ashiba nung ya Aor Sobalibai memelaba ken O aika keta lir. October 24, 1876 anogo Molungkimong doktsür yim tasen akumi aoba ya Molungkimong yim telongtet nung mepu ka, Compound ka mesüra nai ashi ama kiyong ka razüka aoba ama masü, saka idangji Molungkimong nunger aser ano Oba Chungtia-ia yim tasen akumtsüji noktangka yim süngküm doktsür oa yim tasen akumba. Anungji, yangi arok senmang ta jembitsü madoker, kechiyong asen Aor sobaliba nung kodang yim ka süngkümshi doktsür yim tasen kuma odid idangji iba yim senso aser senmang temeden tembanger. Anungji, 24 October 1876 anogo nungi Molungyimsenji arem tasen leppoka yim tenüng tasen jar among süngkümshi balaka, Senso-a balaka aser Temzüng Ozünga balaka sür liyonga arur. Ano maneni nü tangatetba nungjisa olen ka ajanga tebilemdangtsü ka lemsar. Ner yim nungia yim tasen razüka aobaji Baptiba züngsemtem dener aoba aser yim tasen nungji yimjen nung Arogo tenzükba küm mamshi. Molungkimong nung mezüng Arogo tenzükba ya Aor aser Naga nunger arok otsü, saka ya Molungkimong juri senmang.

Yamaji, Molungyimsen kumer küm 110 ajungba anogo 24 October 1986 nü Molungyimsen Students' Union-i Molungyimsen yimkumba Rionsanger NUNGSHI LONG azüng. Iba long nung "OCTOBER 24, 1876 NUNG MOLUNGYIMSEN YIMASER BAPTIST AROGO TENZÜKBA" ta zülur azüng. Ano 18th March 2011 nü Nagaland Chief Minister Shri. Neiphiu Rio-i semzüksüba "PILGRIM ROAD TAMANGTIR LEMANG" monolith nunga '24th October 1876 anogo Molungyimsen yim, Arogo, aser Christian mission Centre tenzük' ta lir. (Trl. from English). Yamaji 1876 nung ajemdaker Molungyimsen Arogo Centenary (1876-1976) aser QQC (1876-2001) bo shidak mungogo.

Milak nung Dr. Clark-i Kor ajemdokba otsüji, tsüraburi jembia aruba otsü tejangja lir. Onoki shidak dang zülü. Mokokchung S.D.O Noel Williamson otsü den ajiptepa jimbir masü. Aserbo, Dr. Clark Longkum aser Wamaken yimi aodang O meyipier aser temeiner anir mao ta onoki mezülü.

Naga tenem nung mezüng Molungkimong-i Khristan yimsü bener arur Godhula Babu aser tebuttsü Lucie Buri tenati tenzüka asen Naga lima Molungkimong nung arem min chiteter metsüh proka alu yimteter tsük tangzüka aliba rohzük ama Dr. Clark atua mezüng Arogo tenzüka yutsü. Iba ya Molungkimong Kosasanger Putu Yimsüsür-i yimsü tasenji temulungerbo ajaki agizüka amshitsü temelaba agütsüba ajanga lir. Yimsü tasen arur küm pezü sülen Rionsanger putu tasen aitsüpurtem Kosasanger putu (tejenpur) yimsüsürtem den ken O menaher putu matsüngteti Rionsanger telok yim tasen kuma ao. Iba Otsü ya yimsüsür-i Atsüng Salang nung Nülak asongdang Nü amer dang jembir aser zülü record nung amshia aruba masü. Tejangja metetnura Molungkimong Putu yimsüsür ajuruangma.

Arogo otsü ken O adoker mapang talangka arur aser ya Tir Yimyim Olemsabang nung zülutep agi matemtsü aser melangzümatsü. Saka, nai tatem nung Shin O ka nung ajemdaker onoki aibelena züluba agi dangar tsükdaka lia lir ta ashiba amala yabo tejak o tejak na chitepa angatettepba tajungba, kechiyong yamala mensem ajanga ochi aser ochi mesükba ken O bendangtettsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo kati Laishiba tenlatsü mepishiba ama Laishiba aika angu



February 28, 2025: March ita tetenzüklen England kübok Darlington nung Arogo tasen ka tentettsü lia iba Arogo jagi online ajanga parnok nem Laishiba tenla agüjang ta mepishiba ama Laishiba 92 nguogo.

Arogo tasen nung züngsemtem Laishiba alidang sen meindoktsü atema St Mary's Cockerton nung curate, Rev. Jess Monopoli-i online ajanga temelungertem dang Laishiba tenla agüjang, ta mepishia liasü.

Rev. Jess-i, "Tang onok ket nung Laishiba 92 lir aser ajak senteperbo Laishiba 103 lir. Onoki meteta maliba nisung ka aser Arogo kati onok nem Laishiba aika tenla agütsüogo. Nisungbaji Birmingham nungi aser onok nem tenla agütsüba Arogoji Oxford anasa lir," ta

metetdaksü.

"Tenlatsü atema Tanela Temeshi ajanga parnok melungjang ajungmesoa liasü. Onoki tenla agütsür ajak dang pelar," ta lai metetdaksü.

St. Mary's Cockerton-i commission asüba The Haven Arogoji West Park nung tenzüksü. West Park ya nütsüng kanga kera ainba kiyong ka lir.

Iba tesem nungji Arogo amenokba ajanga Faverdale aser High Grange na densema temeket aliba tesemtem-a aika ayimjemtsü.

Rev. Jess Monopoli-i, "The Haven Arogo tenzüksü atema onoki kanga yongyar. West Park nung alirtemi mapang talangka nungi tamangertem longjemtsü atema yongyaa aruogo aser tang onoki ibaji

ANO GO ABEN TSÜNGREM DEN

Temeshi aser temenen ain adokba

"Ne ain adokba manung anü teludaktsü"
(Efesa 4:26).

Nü ain adokba tashiji endoktsüla ta masü, ibai meraketa melenshitsüla. Ne ain adokbaji memeshiba mi ama asütsü akok; ano ibai mi den me yoktepa ayimba tzüym ka asütsüa akok. Idakji tesangwa dang nungi mokozüang tuluba adoktsüa akok, temeshiba nükjidong dang nungi shi jangraba, pei atema bilemba, merumeruba tuluba asutsüa akok; Tsüngrem sentsüwangshi asoshi inyaktsü bilemba madentsü akok. Memeshiba ain adokba jagi "molumi" mi tali jangrudaktsür; temeshi ain adokbaji Tsüngrem külemdak tenla agütsüba milak nungi mi agiba lir.

Ain adokba jagi asen jakla jungkai adoktsür. Ain adokba nung tajungtemji kechisa? Kechi agi aji tsükloker? Pei atema bilemba ajanga asü, mesüra temeim aria bilemba ajanga tsükloker? Pauli ain adokbaji pa medemer dang ochi meshii timi mamshiba ngua ain adok. Pa ain adokba mi nung kecha memeshiba mali asü; ibai oxygen mi ama liasü. Iba ama ain adokbaji asenoki pelaseta agizüktsüla. Asen sasa agi temeshi ain adokbaji meinyaktettsü. Tanela Temeshi mi nung asenok baptiba ajanga asenoki ibai inyaktet. Anungji tamasa asenoki Tanela Temeshi mi nung baptitsü bushitsüla.

Nigeria nung Fulani teloki pastor ka injang agi yirutsü; Khristan 6 apu

February 28, 2025: February senotsü akhangba osang 22 aonung Nigeria nung Delta state kübok Islamic Fulani teloki Elyon Paradise Ministry Arogo mita aodang Pastor, Divine Omodia injang agi yirutsüogo aser Arogo nung züngsem trok puer ao, ta International Christian Concern (ICC)-i metetdaksü.

Tang Pastor Divine Omodia hospital ka nung treatment agidar.

Pastor Steve Victor Onuchukwu-i, tang tashi nungbo Fulani teloki puer aoba Khristantem chioktsü atema

senotsü akhangba osang memetetdaksü, ta ashi.

Meimchir temeden atema inyaker, Victor Ojie-i, Delta state nung prangpong amer telok balalai timtem kanga agütsür, anungji talisa Otulu arem nung jenoka aliba teloktem mita aotsü nüngdak aser nüburtem nem security agütsütsüla, ta metetdaksü.

Tesüiba küm ka tsüngda Nigeria nung Fulani telungpurtemi Khristan 5,000 shi tepsetogo, aser ibaji 2023 küm den medemdangra ishiba tepsetba lir.

UP nung anti conversion ozüing kübok Khristan aika apu

February 28, 2025: Uttar Pradesh nung tesüiba hopta ka tsüngda anti conversion ozüing- Uttar Pradesh Unlawful Religious Conversion Prohibition Act kübok Khristan aika puogo, ta osang ka ajanga metetdaksü.

Raebareli aser Sitapur district na nung police-i mita aoba mapang nung Khristan aika apu.

February 22, 2025 nü Rae Bareli district kübok Sandi Nagin yim dak Pastor Vijay Singh'er kidang pastor den Ajeet aser Ravi Kumar nunger apu.

Tetsür ka, Sushma densema parnok ajak Rae Bareli police station-i anir ao. Tesülen Pastor Vijay densema parnok pezüprongla Raebareli District Jail nung puok.

Tesülen osangkakettem nung, tanurtem Khristan yimsü dangi meyipdaksüba nung shilem agir telok ka puogo, ta osang proka liasü. Iba telok jagi tesüiba küm aika Mill Area police jurisdiction nung tanur-

tain aika sen agi mesüzükba den külemi tanga teyari balala agüja tangartem Khristan yimsü dangi meyipdaksür, ta pastor den Khristan asem nem tai tongloksü.

Mill Area police station nung tongti, Rajiv Singh-i, Khristan missionary temi Sandiram, Dighiya aser temeket aliba yimtsüngtem nung sarasadem sentongtem ayongzüka agir aser senotsü den tanga teyari balala agi mesüzüka Khristan yimsü dangi meyipdaksür; parnoki tanurtem nem nanglong aser pencil agüja sarasadem sentongtem nung adentsü mesüzüker, ta metetdaksü.

Ano tanga tatalokba ka nung, Rae Bareli district kübok Dighiya yim dak nunga police-i AG Arogo nung pastor, Anil'er ki mita ao. Pastor Anil kidang maliasü, anungji parnoki par jabaso puer ao.

Pastor Anil'er jabasoji February 24 nü puer aoba sülen Dighiya police outpost nung

puoka liasü, ta kasa osang ajanga metetdaksü.

February 25 nü Pastor Anil'er jabasoji chiok ajisüaka nikongdang 2:00 ako meta Pastor Anil apu aser kasa aonungjisa pa bail nung chiok.

Ano tanga tatalokba ka nung, February 23 nü Sitapur district kübok Hargaon yim dak Khristantem tekülem sentong tagidak mapang nung police arua timtem agütsü aser Pastor Suresh Chand den pa kinüngtsü Nutan Kumari aser Arogo nung züngsemtem- Meena Devi, Uttam Balmiki, Vinit Kumar Redas aser Ladli Devi puer ao. Unlawful Religious Conversion Prohibition Act aser BNS 127/2 kübok parnok anema ken o benokogo.

Sitapur district nung senotsü teyari agütsütsü aser ki sütsütsü ta nangzüka Khristan yimsü dangi meyipdaksütsü merangba atema tetsür pongu den tebur asem apu, ta osang ka ajanga metetdaksü.

Bajrang Dal züngsemtem

iba tesem jagi aruba mapang nung nisung 400 shi adenshia liasü. Khristantem jagi Bajrang Dal nung inyaker nisung asem ki ka nung shibanga yua liasü saka police-i par asemprong kümzü, ta Khristantem nem tai tongloksü.

Ano social media nung video ka prokshiba sülen ketdangsertemi Pastor Shyam Daniel'er ki mita ao.

Khristantem atema ken o jembitsür kati, "Nütsüng ajema aliba tamangertem anema mita aoba kanga bulua kümogo. Tekülem sentong agiba nokdangtsü atema anti-conversion ozüing ya hadir ka ama amshir," ta metetdaksü.

Yaküm July ita nung Uttar Pradesh nung anti-conversion ozüing tesashiba küma yanglua liasü. Iba ozüing kübok aibelenertem küm aika tepuokdak ayutsü aser senchi aika achitsü.

Uttar Pradesh nung anti conversion ozüing tasenba kübok bail dak sendakba

telatetba tesashiba kümogo aser ozüing alema yimsü meyipba/meyipdaksüba nung aibelenertem tajemba agia küm 10 nung tenzüka taküm piyong tepuokdak ayutsü.

Kasa ozüing kübok, tashiyim amshia, mesüzüka mesüra ashikülak ajanga tamangba yimsü meyipdaksüba nokdanger aser Khristan missionary tem mapa ajakji tashiyim ajanga mesüra yimsü meyipdaksütsü atema mesüzükba ama züngshitsü.

Ano iba ozüing kübok ken o benokba dak sendakba nung, iba ozüing kübok aibelenba atema nisung mashie kati police mesüra ketdangsertem nem osang metetdaksütsü akok.

Ano khen nung nisung aika tamangba yimsü meyipdaksüba ken o nung aibelenertem küm 7 nungi küm 14 tashi tepuokdak ayutsü akok.

Iba ozüing tasenba kübok aibelenertem dang senchi 100,000 (lakh 1) tashi achitsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tekong

(n) tokolak o temang na sentaktepdaktsüba temang shilem (neck)


* Tetsür tekong talang agi topur jungdaktsür.

Tekongnem

(n) tekolak o tapu na tsüngda tesülen, tekong tenem (nape of the neck)

* Khu tali abendang tekongnem kanga ashir.

OLONG PAITEP # 7077



TIPIEN

1. Mali (4)
5. Tebilemba züluba (4)
6. Ochishir masü (7)
10. Maneni (3)
11. Shisadang (9)
12. Aso (3)
15. Chi kenshiba oset (7)
17. Saklok (4)
18. Ya kanga tako (4)

LANGTSÜNGLEN

1. Aon nangdaktsüba (5)
2. Alima toktsür ao (3)
3. Tekolak meshitak (4)
4. Tekolak o temang na tetsüngda (6)
7. Kidang alir (5)
8. Jang asepha oset (3)
9. Nü dang tambu (3)
10. Talangka mepila (5)
11. Aoksa (6)
13. Sü atakba lisü (5)
14. Tsüngremi sayu (4)
16. Teka agi amet (3)

OLONG PAITEP # 7076 TELANGZÜBA

TIPIEN :

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA



TreeGens founder Jimi Cohen-i anogo ka nung süngdong teimtiba atemba indang Guinness World Record ngutetogo. Shimoni, Kenya nung Cohen-i ghonda 24 tsüngda mangrove trees 30,469 atem. Tesüiba nung Canadian environmentalist Antoine Moses-i ghonda 24 nung süngdong 23,060 atemba otsü Cohen-i ajatetogo.

USTM Chancellor apuba atema PM Modi dangi shidi zülü

Guwahati, February 28, 2025

(Agencies): Muslim nunger sensotemi Prime Minister Narendra Modi dang Assam Police-i University of Science and Technology, Meghalaya (USTM) chancellor Mahbabul Hoque apuba atema shidi ka zülüogo.

Muslim nunger telok nung taoba chief election commissioner S Y Quraishi aser taoba Delhi Lt Governor Najeeb Jung na dena lir.

Hoque ya taoba Honibarnep Guwahati nung par kidang nungi apu. Kaketshirtem dang marks tajung agütsütsü ta mesüzükba nung pai shilem agi ta Assam

Chief Minister Himanta Biswa Sarma-i tai tongloksüogo.

Iba ken o atema shidi züluba Muslim nungertem ya 'Citizens For Fraternity' ta ser civil society organization nung züngsemtem lir.

Hoque apuba ya tanga kecha agia masü saka mereprangnüba agi dang lir anungji PM Modi-i iba ken o atema temeten agütsütsüla ta parnoki shidi nung shia lir.

Hoque apuba ya Muslim nunger sensotemi modern secular institution lapoktsü merangba noktangtsü atema lir ta parnokisa ashi.

Hoque ya charge-sheet

mesüra arrest warrant kecha melii dang apu aser Guwahati nungi kilometer 300 shi pilar Karim Gunj Jail nung puoka lir ta shidi nungsa shia lir.

Pa apuba sülen anogo ka lir agütsüba charge-sheet nung pai Class 12 tatidang nung kaketshirtemi ozüng alema inyaktüsü ajungmesoba atema tai tonglokja lir.

Hoque ya Honibarnep apu aser iba anogo "judicial redress" maparen inyaktüsü tasak lir. Assam sorkari USTM aser founder anema iba mapa inyakogo ta Muslim nunger sensotemisa PM Modi dang shiogo.

Assam nung ULFA (I) züngsem 2 temai adok

Guwahati, February 28, 2025

(Agencies): Assam Police, Military Intelligence, aser Assam Rifles joint operation ka nung United Liberation Front of Asom-Independent (ULFA-I) züngsem ana temai adok.

Military Intelligence (Kolkata) nungi osang tejangja ka angazükba sülen mita aodang telungpur ana temai adoktsüsa inyaktet aser iba den

ngutetogo.

Tena ya Lt Nabojit Asom aser SS Cpl Niku Asom na lir. Nabojit Asom-i 2010 nung aser Niku Asom-i 2020 nung ULFA-I nung aden.

Tena ket nungi HK Rifle, MQ Rifle, Pistol, HK Rifle Magazines, MQ Rifle Magazines, Hand Grenade aser HK /MQ/.32 injangtem ngutetogo.

Tena temai adokba ajanga

ULFA-i inyaksangshi tashimait kümogo aser maneni telungpurtem temai adoktsü ayongzüker ta ketdangsürtemi ashi. Assam sorkar aser security forces-i state nung tensa süngjema ayutsü tenangzükba lir ta parnoki ashi.

ULFA-I maparen dak sendakba osangtsüsang maneni bendendar aser security agencies-i tena dang asüngdangya asütsü.

RSS tanishir Mohan Bhagwat-i Arunachal semdanger



Itanagar, February 28, 2025

(Agencies): Rashtriya Swayamsevak Sangh (RSS) tanishir Mohan Bhagwat-i anogo pezünü atema Arunachal Pradesh semdangi arua lir.

Mohan Bhagwat-i February 27, 2025 nü Arunachal tonga aruogo aser pai RSS züngsemtem aser lisopur

tamangba lennirtem den ajurutepa sendentem amentsü ta RSS osang ajanga angazüker.

RSS küm 100 ajungba benjung amongtsü aliba ajakdang pai February 27 nungi March 2 tashi Arunachal Pradesh semdanger ta parnokisa ashi.

February 28 nungi March 2 tashi Pachin village, Naharlagun

nung aliba Abotani Vidya Niketan nung 'prant karyakarta shivir (state-level functionaries' camp)' ayonga agir.

Iba sentong nung Arunachal kübok tesem balala nungi RSS züngsem 900 shi adentsü.

Bhagwat-i Guwahati nung anogo pungunü amongba sülen Arunachal semdanger. March 2 nü pa ano Assam-i meyipa aotsü aser RSS küm 100 ajungba dak sendakba atema sendentem amentsü.

Taküm Vijaya Dashami nung RSS küm 100 abensatsü aser iba nüngtem nung linük kübok tesem balala nung sentong balala agitsü renema lir.

Kangpokpi nung KNF-P den yariteper nisung 4 apu

Imphal, February 28, 2025

(Agencies): Kangpokpi Police-i A/155 CRPF den yaritepa tashiyim agi sen sarur nisung pezü puogo.

Superintendent of Police, Kangpokpi lenisüba kübok

tanep 7:30 ako meta Bimparao anasa NH-2 nung parnok apu.

Par pezü ya Lungousem Kipgen (29), Letminlal Kipgen (25), Satminlun Tuboi (24), aser Thanggoulun Kilong (27) nunger

ta jangjaogo.

Parnok dang asüngdangya asüadang Kuki National Front (KNF-P) züngsem Gogou Kipgen (Jamin) tetuyuba kübok parnoki mapa inyakba nangzükogo.

GOVERNMENT OF NAGALAND HOME DEPARTMENT:: POLICE 'B' BRANCH

NO.POL-B/SWR/ESTT/1/2/20(Pt)

Dated Kohima, the Feb' 2025

ADDENDUM

With reference to Government of Nagaland Home Department: Police 'B' Branch, PRESS RELEASE / ADVERTISEMENT No. POL-B/ SWR/ ESTT/ 1/2/20(Pt) dated Kohima 20.01.2025; the following Addendum is made:

- (1) **Serial No. 1 : Deputy Director/ZSWO**, the number of post is increased from 02 (Two) posts to 03 (three) posts.

Other terms and conditions of the advertisement remain the same.

(KUKO MERO)
Secretary to the Government of Nagaland

Israel-Hamas ceasefire atema Egypt nung jembishinü tenzükogo

Cairo, Tsüklai/February 28 (Agencies): Gaza nung Israel-Hamas ceasefire noklem tanabuba atema Egyot nung jembishinü tenzükogo, noklem mezüngbuba ceasefire Honibarnü tembangtsü.

Kanga meranga jembishinütsü atema Qatar aser United States nungi jembishinür den Israel nungi ketdangsürtem Brehostibarnü Cairo-i aru, ta Egypt indang state information service ajanga ashi.

Iba jembishinü nung US Tir Donald Trump'er Middle East envoy Steve Witkoff adentsü akok. Ceasefire noklem tanabuba atema jembishinüba nung rara jungjunga tembangtsü, Gaza nung pua yua aliba takum alir ajunga meyiptsütsü, iba territory nungi Israel sepai ajunga ainshitsü indang densema jembitsü.

Israel-i ashiba agi, Hamas-i October 7, 2023 nü pua bener aor nisung 59 Gaza nung lir aser item rongnung nisung 24 tang tashi takum alitsü ta amanger.

Israel indang Foreign Minister Gideon Sa'ar-i ashiba agi, tezüngzüktep ka agitsü asoshi sorkari tejangja meshiteter aser Cairo nung aliba Israel ketdangsür temi jembishinütsü atema "common ground" ali mali ta reprangtsü.

"Pua alir tali chioktsü aser iba melen mezüung noklem indang framework atsulangtsü mulunga lir ta asenoki ashir. Ibaji takoktsü süra, asenoki aji inyaktsü," ta Sa'ar-i Brehostibarnü osangbener senden ka nung ashi.

US Tir Donald Trump teyari nung Israel Ato Kilonser Benjamin Netanyahu-i Hamas samatsütsü nangzüka iba rara nükjidong sangdonga lir asünung

tangatettep kati arutsü asü masüar memetet.

Palestine nunger tepuodak alir nisung 600 dak tema chioktsü melen Brehostibar aonung Hamas-i pua bener aoba nisung pezü tasü mang meyipa agütsüba sülen yimjung ken o jembishinü ya tenzüker, koba ceasefire noklem mezüngbuba nung nisung melenteptsü züngzüktepa aliba tatembangba liasü.

Nisung tasü mang pezü parnok nem agütsüba jangjaba maparen menuba mechi Israel-i item tepuokdak alir nisung 46 chioktsü thinen. Parnok 46 ya tetsür aser tanurtem kisü ng lir.

Ano iba tezüngzüktep nung tali aibelena Israel ketdangsür temi Philadelphia Corridor nungi sepaitem anizüker aotsü sentong nung aliba ama meinyaktsü ta ashi. Honibarnü nungi tenzüka Israel mitkar tem iba corridor nungi ainshi tenzüksü aser anogo ti tsü ngta tembangtsü liasü, koba Egypt den arütsüa aliba tesem lir.

Hamas-i tezüngzüktep yanglua pangjemba ama inyaktsü temulungtetba nung liaka Israel-i ano tensa tamajung kumdaktsütsü sentong lir ama amanger, ta Hamas ketdangsür Basem Naim-i osangbener dang ashi. "Tezüngzüktep nung aliba ama onoki ozü teinyaktsü inyakogo, aser onoki maneni tezüngzüktep mapa kuma inyaktsü renema lir," ta Naim-i ashi.

January 19 nü tenzü kba ceasefire yagi ita 15 raraba anendaktsü, koba Hamas-i October 7, 2023 nü Israel south tsütsü maka nisung 1,200 shi tepseter ano nisung 251 pua bener aoba ajanga tenzü k.

aser Hezbollah dak ang temulung agütsü.

Mitkar temi Gaza asoshi "conflict management" yimya amshi aser Hamas ya rara tulu tenzüksü atema tejangraba mali mesüra merenemer ta bilema liasü, ta report ajanga ashi.

2018 nungi mangdang tulu akaba sentong yanglua liasü aser ibaji asangsang masü mesüra tamakoktsü ama angatetba kuli tem ajanga sayu, anungji Hamas-i mapang talangba nungi jangra aruba ya mera agitsüla timtem ka ama mebilem. Israel, US, UK aser danga linük temi Hamas ya kiralongrar telok ta sangdonga lir.

Rara tenzüksü anasa Military Intelligence Directorate ajanga 'assessment' tasen ka tenzü k aser Hamas sentong ya mangdang kisü ng masü saka 'operational planning' atema framework tejangja lir ta angatet, ta report ajanga ashir.

Ajisüaka iba asadangtetba ya military intelligence nung

GOVERNMENT OF NAGALAND
OFFICE OF THE LABOUR COMMISSIONER
NAGALAND: KOHIMA
New Capital Complex

NO.LBR-984/84//

Dated Kohima, the 21stFebruary' 2025

CIRCULAR

This is to inform to all the interested candidates that, the training course on cutting & tailoring, knitting and embroidery for the year 2025 is scheduled to commence from April 2025 at the respective Labour Welfare Centres (LWC); (i) LWC Dimapur (ii) LWC Tuli, Mokokchung (iii) LWC Wazeho Mini Cement Plant, Phek and (iv) LWC Doyang Hydro Electric Project (DHEP) Doyang. The application forms for the 8 (eight) months training course will be issued from the respective Labour Welfare Centre's during office hours. The last date for submission of the application forms will be on or before 15th March, 2025. As seats are limited applicants will be selected on first cum first basis. The Department will provide all the training materials, kits, free of cost to each trainee throughout the training period.

Sd/- (Er. S. L. WATI AIER)
Labour Commissioner,
Nagaland, Kohima.

DR Congo anüdoklen M23 rally nung nisung 11 pokset

Bukavu, Tsüklai/February 28 (Agencies): Democratic Republic of the Congo (DRC) anüdoklen Bukavu yimti nung M23 rebel group aser parnok bhukumer atema rally agidang bomb apokba lendong nung nisung 11 asü aser 65 yiru, ta rebel alliance indang leniri ashir.

DRC tir, shibai kidangr Rwanda-i sorkar anemertem yarir ta ashir, pai social media X nung Brehostibarnü nisung kar asü ta ashi aser Congolese li nung bendanger army ozü ng alema aita aliba tenü ng asen.

M23 densema aliba Congo River Alliance lenir Corneille Nangaa, shiba rally nungya liasü, pai ashiba agi, grenades amshia pokdaktsü aser kasaji DRC nung Burundi army temia amshir. Ajisüaka pai ashiba ya shidak asü masü ar mejangjateter.

Mezü ng apokdang rally nung alirtem aoksatepa iba tesem nungi jena ao aser tanaben apok, ta AFP news agency ajanga ashir. Yangji alirtemi ashiba agi, apokba den külemi prangbong ola angashi.

Video nunga nüburtem yimtung nung asemzüba aser kar azü yima aser kar yirur alirtem anir aoba nguogo.

Hopta ana shi jakdang Nangaa'er sepai temi Bukavu amokbangba sülen pai adenba senden ibai mezü ngbuba liasü.

Iba lendong nung pa mesüra danga rebel commanders tem meyiru, ta pai phone ajanga osangbener dang ashi.

Sorkar anemba M23 fighters temi tawa atsü ngdokba tongtipang yimti ana nung Bukavu ya ka lir, aser parnok ya Rwanda-i yarir ta United Nations mongin temi ashir.

DRC indang army nungi rakzü kba tesemtem nung akhi ama sü ngjema alitsü ta sayutsü meranga telungpur telok yagi ports aser school tem tanaben lapokogo.

M23 fighter tem DRC anüdoklen atsü ngdoka tongtipang yimtittem rakzü k aser nisung 7,000 shi tepsetogo. Tanurtem dak tim masüba mapa inyakba aser anojungi sepai ama shimba osang lir.

Sorkar anemer temi tesem balala nung takok anguba ajanga Rwanda densema DRC kidanger tem regional war ka nung atsüoktsü tetsübo lir.

Ibai DRC anüdoklen küm ter dak tema raraba nung tamajungtiba ta zü ngshir, koba Rwanda nung 1994 genocide prokshia DRC-i aitba nung tera yanga lir aser DRC indang ali rongsen aziüoktsü merangba lir.

Israel mitkari civilian tem kumzüka meytutet: Report

Tel Aviv, Tsüklai/February 28 (Agencies): Hamas-i October 7, 2023 nü amakdang aibelenba ajanga tamakok ajuruba indang tatalokba Israel mitkari tang mezü ngbuba sangdongogo, koba ajanga Gaza rara tenzü k.

Iba report tembanga Israel Defence Forces (IDF)-i Israel nunger civilian tem kumzüka ayutsüba mission nung tamakok ajuru ta shia lir.

Kaket tapak 19 aliba report nungya Hamas aser danga Palestine nunger telok balala nisung nisung 5,000 shi Israel telungi aita nisung 1,200 shi tepseter ano nisung 251 pua bener aoba indang timba shia lir, koba alimai meteta lir.

Iba report nung tatalokba balaka temai adoktsüba mali, saka Hamas tebilemba junga mebendangtetba aser par tashi mezü ngshiba indang ashi.

Report ajanga ashiba agi, mitkar temi Gaza ya "secondary security threat" ama zü ngshi aser parnoki Iran

aser Hezbollah dak ang temulung agütsü.

Mitkar temi Gaza asoshi "conflict management" yimya amshi aser Hamas ya rara tulu tenzüksü atema tejangraba mali mesüra merenemer ta bilema liasü, ta report ajanga ashi.

2018 nungi mangdang tulu akaba sentong yanglua liasü aser ibaji asangsang masü mesüra tamakoktsü ama angatetba kuli tem ajanga sayu, anungji Hamas-i mapang talangba nungi jangra aruba ya mera agitsüla timtem ka ama mebilem. Israel, US, UK aser danga linük temi Hamas ya kiralongrar telok ta sangdonga lir.

Rara tenzüksü anasa Military Intelligence Directorate ajanga 'assessment' tasen ka tenzü k aser Hamas sentong ya mangdang kisü ng masü saka 'operational planning' atema framework tejangja lir ta angatet, ta report ajanga ashir.

Ajisüaka iba asadangtetba ya military intelligence nung

lenirtem nem memetetdaktsü.

Hamas tebilemba aser parnok dak timtem aliba aziüoktsü atema mitkartem tsü ngta melungjemtetba indang report ajanga jangjatet.

"Asenok tai asünungbo koda? ta asüba indang junga mejembi," ta report ajanga ashi.

Liyonga arudang itdangiter temi Hamas jenjang asadangba aser asangsang tsü ngta maneni tawa tulu adok.

Sobaliba, tamangba yimsü, oshi aser puti otsü densema tsükchir indang tebilemba angatetba nung ajema akum, ta report ajanga ashi.

Report ajanga intelligence directorate indang yimsü kanga tajungba kuma melenshitsü, tashi-temeteter tem tali saksalemtsü, arendaka alitsü, angatsü, angazü ktsü, o inteptsü aser tajung agi mangatettep adoktsü nü ngdaker ta ashi.

Jenjang aketba itdangiter osang kumzüka ayutsü tejangraba aliba ajanga mitkar

temi October 7 matongdang saksalemtsü mashi.

October 7 nü Gaza Division ya ghonda ishika atema kanga junga koktet, anungji kechi ataloker, aji angatettsü aser telangzüba shidak agütsütsü tashi mabensai kumdaktsü, ta ashi.

Air Force-i kanga kera telangzüba agütsü, saka IDF sepai, civilian aser kiralongrar bendangtsü kanga tasak liasü, ta ashi.

Tesem kar nung civilian dang nungi yirur aliba sepaitem mezü ng anizüker ao, ta report ajanga ashi.

Hombarnü sepai tanishir nem iba tebushitetba agütsüba sülen IDF indang chief of staff menden nungi alutsü alisang Lt Den Herzi Halevi-i tamakok aluba ajak pa tai ajanga lir ta ashi.

"Ni kü aibelen agizüker. Ibai kü meyong. October 7 nung ni army indang commander liasü aser kü teinyaktsü liasü aser nenok teinyaktsü ajak kü mapa

liasü. Itemji kü indang ama ni bilemer. Aser meshidakba command ajunga nung kü shilem liasü," ta pai video nung ashi.

Mitkar tanishiri tamakok ajuruba mechi mapa nungi anener ta taoba ita sangdong aser tarutsü nung iba ama lendong nokdangba nung yaritsü asoshi bushisü ngdangtsü ayongzü k.

Israel Ato Kilonser Benjamin Netanyahu, shibai October 7 nü atalokba indang tenü ng kecha agia mali, paibo iba ama bushisü ngdang ya rara metembang tashi atatsüla ta ashi.

Pa anemer temibo Netanyahu-i aibelenba nangzü ktsü memulunger ta aitsü.

October 7 nü amakba langzüa Israel-i anunglen aser alilen nungi Gaza amak aser iba mapang nisung 48,365 tepsetogo, ta yangji Hamas meyong health ministry ajanga ashir.

UEFA-i referee David Coote nem 2026 tashi tenokdangba agütsü



Nyon, Tsüklai/February 28 (Agencies): Euro 2024 nung asaya ketdangsüba mapang referee David Coote-i 'white powder' teni len nungi asüokba indang video ka taoba küm meyi mapang temai adokba bushisüngdangba sülen UEFA-i pa nem tenokdangba agütsüogo.

Bushisüngdangba sülen Europe nung football asaya

ketdangsüba tentet ajanga maksü agi sünger aliba referee ya June 30, 2026 tashi UEFA asaya kata ketdang masütsü tenokdangba agütsü.

"David Coote-i General principles of conduct, Art. 11(1) DR, Art. 11(2)(b) DR nung aibelenba mechi June 30, 2026 tashi UEFA referee mapa kecha meinyaktsü nokdang, ta UEFA

sangdong ka ajanga ashi.

Ano video footage ka nung Coote-i taoba Liverpool manager Jurgen Klopp aser club anema o tamajung jembiba yong Professional Game Match Officials Ltd (PGMOL)-ia pa indang contract agienja liasü.

2019 küm Leeds aser West Brom tsüngta Championship match ka masayadang yellow card agütsütsü atema Coote-i jembiba ta tai tongloktsüba sülen Football Association (FA)-ia bushisüngdang tenzuka lir. Arishi küm 42 tain Coote-i October 2019 nung Leeds United aser West Bromwich Albion tsüngta asayadang Leeds nungi asayar Ezgjan Alioski nem yellow card agütsüba indang asüngdangya.

Coote-i item tai tongloktsüba kata magizük aser sangdong ka nung pai teti asaya yimya shidak wazüka amshi ta ashi.

"Kü jurila takum nung kechi tebilemtsü lider liaka itemji ajanga asayadak ni telemtetba agiba nung kodanga mokongshi. Ni tematiba jenjang nung akumtsüboa asaya yimya shidak wazüka ayu aser ni akokba agi tajungtiba nung indang-indanga referee mapa inyak," ta sangdong nung ashi.

Dubai Championships nungi Daniil Medvedev tsükogo



Dubai, Tsüklai/February 28 (Agencies): Brehostibarnü Dubai Championships tennis asayamung quarterfinal nungi taoba mapang world number one nung alisang Daniil Medvedev tsükogo, shiba amajok nung match points pezü indoka Netherlands nungi Tallon Griekspoor-i takok angu.

Jenjang 47 buba nung alisang Dutch nungbai 2-6, 7-6 (9/7), 7-5 agi takok angudang world number 6 mit adoka liasü.

Dubai nung 2023 champion Medvedev set tanabuba nung match points pa kabu nungi pila aoba ngur asayar memesük yimya amshia ain adokba yong code violation agüja liasü.

Pa mit adokdang umpire

Adel Nour-i Russia nung asayar tsütsü "double standards" yimya amshir ta aitsü.

Nour-i meyiper Medvedev dang pai asayar ajak kasa yimya nung amshir ta langzü.

Griekspoor-i kanga süngjema asaya aser match point pezü buba nung takok angu.

Asaya tatemi Medvedev-i Nour den teka amtepa salemtsü memulung.

Arishi küm 28 tain Griekspoor, shibai round mezüngbuba nung Roman Safiullin akokdang match points asem tashi nokdangtet aser defending champion Ugo Humbert tsükdaktsü, pai final atema Stefanos Tsitsipas den

asayatsü.

Seed pezü buba nung alisang Tsitsipas-i kanga meranga asayar 7-6 (7/5), 1-6, 6-4 agi Italy nung Matteo Berrettini madak takok angu, koba taoba küm July ita sülen tang mezüngbuba semi-final tongteteter alitsü.

"Iba takok atema ni kanga pelar. Daniil ya asayar tajung aser tetokteper tajung. Pa küm aika rankings temaba jenjang nung liasü, anungji ni iba takok yagi temulung asür," ta Griekspoor-i ashi.

Canada nung Felix Auger-Aliassime-i taküm küm tenzüker asaya 15 buba nung takok ngua taoba US Open champion Marin Cili madak 6-4, 3-6, 6-2 agi koker 2025 asoshi semi-final pezü buba tongtetogo.

Jenjang 21 buba nung alisang Auger-Aliassime-i "Taküm junga tenzuka lir," ta ashi, shibai taküm Adelaide aser Montpellier asayamung takok marok bena lir.

Auger-Aliassime ya France nung Quentin Halys den asayatsü, shibai Italy nung Luca Nardi madak 2-6, 6-3, 7-6 (7/5) agi takok angu.

Halys yagi mezüng round nung former champion aser jenjang toku buba nung alisang Andrey Ruble tsükdakja liasü.

Jos Buttler-i England indang white-ball captain mapa yutsür

Lahore, Tsüklai/February 28 (Agencies): ICC Champions Trophy asayamung nungi tsükba sülen Jos Buttler-i England indang white-ball captain mapa yutsüogo.

Arishi küm 34 tain Buttler-i England captain ama iba asayamung group match tatembangba anir Honibarnü South Africa den asayatsü.

Bodhbarnü Afghanistan-i akokba ajanga England ya Champions Trophy nungi tsükatokogo, koba Buttler lenisüba kübok white-ball asayamung asem buba nung atonga tamakok ajurur alitsü. 2023 küm 50 overs World Cup aser taoba küm T20 nung pa lenisüba kübok tamakok ajurua liasü.

"Ibai ni atema telemtetba shidak lir aser ibai team atema telemtetba shidak lir," ta Buttler-i ajungbena Lahore nungi osangbener senden ka nung ashi.

"Ni lenmang tatembang tongogo."

Taoba mapang asayamung

indang hangover tera dener England ya Champions Trophy nungi tsük ama bilemer, ta pai ashi.

Buttler ya England-i 2019 World Cup akokdang züngsem ka liasü aser international asaya nungi Eoin Morgan anisüngzükba sülen captain ama 2022 küm shim.

Pai kasa küm Australia nung T20 World Cup akok, saka India nung 2023 World Cup tenzükba sülen England ya form kanga ajema akum.

Yangji parnoki asaya toku asayaba nung asem dang akok aser iba sülen ODIs 16 asayaba nung 12 nungbo tamakok ajuru, aser yangji tan agi asaya trok atonga tamakok ajuruba densema lir.

Taoba küm parnoki T20 World Cup semi-finals atong saka India-i akok.

"Tangbo kü mulungjang nung tejashi aser tezü atangba agi sünga lir, saka mapang nung item ajakji süyitsü aser akhi ama ni cricket asayatsü," ta Buttler-i ashi.

Indian Wells nung Emma Raducanu asayatsü



London, Tsüklai/February 28 (Agencies): Taoba US Open champion Emma Raducanu ya taruba hopta Indian Wells nung tokteptsü, koba Dubai asayamung sülen tang mezüngbuba asayamung nung shilem agir alitsü, kong nisung kati la tsütsü yimya tamajung sayuba yong la asaya mapang stands nungi anizüker ao.

Indian Wells nung Raducanu nem security tali agütsütsü, koba March 5-16, 2025 anogotem asayatsü lir.

Britain tsür Raducanu ya taoba hopta Dubai Championships nung round tanabuba Karolina Muchova den asayadang temulung nung anisüngzük ka mali ama ajitet aser umpire indang menden tesülen nokdak aser iba mapang

nisung ka security personnel temi anizüker ao.

Lai iba sülen asaya tenzuka 4-0 agi la jenjang tamajungba aliba tiebreak tashi asayar 7-6(6) 6-4 agi tsük.

Raducanu-i ashishiba sülen Dubai Police-i iba nisungba ya apu saka lai iba nisungba anema ken o mebenoktsü telemtetba agi.

Tetsür tennis amokbanga aluba WTA ajanga iba nisungba ya par asayamung ajunga nungi nokdang aser Raducanu aser lar team den teka amteper lai nüngakba teyari ajak agütsütsü ta ashi.

2021 US Open akokba sülen Raducanu ya form dangi maruteti aser temang nunga timtem balala ajangshia arur aser tang rankings nung la jenjang 55 buba nung lir.

BILEMDANGANG

"Dangar asoshi mapa tajung inyakba ajanga nü temulung süngzüktsü."